

COIRA: «Quadrins» pigl convict dalla Scola cantunala

Durmeir cun «Quadrin»

G.N.S. L'istorgia da success digls moduls da lenn «Quadrin» cuntinue-scha. Las proximas emdas vignan montos 102 da chels «blocs» da lenn, noua tgi igls scolars e las scolaras dalla Scola cantunala vignan a pernottar a parteir digl mez avost per 27 meis.

«Quadrin», igl modul da lenn è egn da chels products dalla Uffer SA, Savognin, tg'è oz agl-manc schi popular scu igls dus capricorns da Grischun Vacanzas, «Gian e Giachen». Aint igl frataimp canoscha an Svizra vigl e gioven chellas dus «figuras» grischunas. En veir product grischun è er igl «Quadrin», igl modul multifunziunal, tgi è oz dasper blers oters, egn digls miglers products tgi la firma Uffer SA ò aint igl sies grond sortimaint. Davos chella idea innovativa stat en nom, Enrico Uffer. Igl patrung dad 80 ampluias ò a disposiziun en team mutivo, ampluias tgi von a pèr cun el e mastirants fidos. Vetiers vign tgi igl sies menaschi è ancunaschaint per en bung travagl, noua tgi qualidad ò prioritad. Chegl è bagn la raschung tgi igl cantun ò incumbenzo la Uffer SA da produtgier igl objetc provisoric digl convict dalla Scola cantunala a Coira.

Igl favrer antschet cun la produenziun

La mesadad digls 102 moduls da lenn è ple u manc montada ed igls oters vignan montos alla fegn da chest meis, dei Enrico Uffer. Igl alloschamaint provisoric cumpeggia dus bietgs, tgi èn colliias l'egn cun l'oter ed er cun la mensa provisorica. Mintga object ò treis plangs e comunabel on els 102 tgombras per gronda part tgombras singulas e varsa-quants tgombras doblas. Las stanzas da durmeir èn indirzadas simpel e tuttegna con-



Igls dus bietgs èn colliias l'egn cun l'oter.

fortabel. Igl mobigliar dallas tgombras vign cumpro pigl alloschamaint provisoric, cuagl intent da saveir duvvar chel per las novas tgombras digl convict tgi duess esser a fegn igl otgover 2020.

Igl favrer antschet cun la produenziun

Scumanzo cun la produenziun digls total 102 «Quadrins» ò la Uffer SA igl favrer da chest onn. Igls singuls elemaints èn nias produtgias maschinel e cun la tecnica da computer la pi moderna. La montascha da chels elemaints per cumpletar igls moduls da lenn è neida fatga a mang e chegl ainten la sagonda halla dalla Uffer SA, gist dasper igl luvratori principal. Lò èn er nias installos igls indrezs sanitars antras la firma Caspar SA da Tini-zong. Enrico Uffer dei, tgi singulas lengias ins vegia indirzoo a Savognin, la gronda part pero gist agl li a Coira eneda tgi igls «Quadrins» on survagnia lour post. Chella lavour fò per la Uffer SA igl affar Banzer SA da Tusang, en tra-

vagl spezialiso per installaziuns electricas. Graztga a chella bela incumbensa digl cantun ò Enrico Uffer gia a parteir digl favrer lavour per 25 ampluias e chegl è fitg positiv.

Ena investiziun da 2,9 milliuns francs

Per chel alloschamaint provisoric, noua tgi 102 scolaras e scolars vignan a pernottar per en pi lung taimp fò igl cantun investiziuns da 2,9 milliuns francs. Eneda tgi la renovaziun digl convict è a fegn, vignan igls «Quadrins» demontos e duvros per en oter intent. Igl alloschamaint provisoric è colliia cun la reit da caleira a distanza digl martgea da Coira. An cumbinaziun cun la construcziun tscharneida da moduls da lenn sa resulta ed edifezi fitg ecologic e persistent.

Dad Adelboden anfignen Locarno

Igls «Quadrins» sa vendan prest scu panets frestgs e chegl cunzont ordvart igl Grischun. Gist ainten la Surselva bernesa furnescha el adegna puspe chels moduls da lenn, menziunescha Enrico Uffer. Igl schaner passo on igls «Quadrins» per exaimpel fatg en bung sarvetsch agls organisatours dallas cursas da skis dalla coppa mundiala ad Adelboden. A Turitg e conturn von er blers da chels «blocs» da lenn produtgias a Savognin, scu er an oters lis dalla Svizra orientala. La stad 2017 on igls stars digl festival da musica «Moon And Stars» a Locarno gia graztga agls «Quadrins» ena tribuna fitg singulara ed er la stad tgi vign è chegl igl cass. Damai cantan stars scu «James Blunt» u «Scorpions» sen igls «Quadrins», igls scolars e las scolaras dalla Scola cantunala chels «dorman» schizont cun «Quadrin».



Las tgombras èn simplas e funcziunalas.